



## 跋倒

咱人出世的時紅紅幼幼，差不多攏有序大人咧照顧佢養飼，會使講比真濟無人疼、無人晟的野生動物加誠好命。到甲開始學爬、學行的坎站，無拄好就定定會跋倒，這嘛是真四常的代誌。這個時陣，序大人定定攏會講：「囡仔人骨頭猶軟軟，會跋才會大。」會大當然是咧講肢體方面的成長。

等甲開始去學校讀冊，佇學業方面就會佢人相比並。毋過，逐个人的生張無可能是平懸、平大的，無論是身體、頭腦抑是精神方面定著是會無全款的。閣再講，人生無人會當保證一世攏擡順風旗，起起落落才是正常的。若準講有時會倒退，無的確就是另外一個進步的起頭。早前有一寡少年人，無法度忍受學業的壓力，做出真濟戇代誌，實在有夠無彩，嘛足毋值的。

到甲青春期，除了學業以外，定著會拄著男女之間種種的問題。愛情對少年人來講當然是大代誌。有人講：「婿穠無比止，佢意較慘死。」可見毋但是婿穠的問題爾爾，緣份嘛是蓋重要的因素，毋才有人講生婿不如生緣，閣有人講：「緣份若到，米心就會透。」若是按呢，何乜苦單戀彼蕊花咧？

人佇社會咧拍拚，攏是會起起落落、浮浮沉沉。咱臺灣真出名的企業家許文龍先生，捌咧教示伊的員工講：「跋倒的時陣毋通隨跣起來，著愛四箍輾轉揣揣、看看咧，看有啥貨通好拚無。」當然毋是欲叫人拚錢抑是拚啥物寶貝，是咧叫人順勢吸收寶貴的經驗，對失敗當中學著物件，予家己會當成長，這就是先賢教示咱的「跋一倒，拚著一隻金雞母」的道理。

人生短短數十年，會漸漸行到尾站，這個時陣是「老骨有(tīng) khong-khong，老皮袂過風」，萬不二若跋倒，無定著就無法度閣再跣起來矣，這才是上大的悲哀。欲按怎予老大人無病無疼，會當好好仔老去，才是真濟老大人上向望的代誌。

作者：陳憲國

### ☆詞彙學習☆

【晟】tshiānn：養育。

【坎站】khám-tsām：階段。

【四常】sù-siōng：平常。

【比並】pí-phīng：相比較。

【生張】senn-tiunn：天生的。

【擡順風旗】giáh-sūn-hong-kî 一路順風，  
毫無波折。

【無彩】bô-tshái：可惜。

【婿穠】suí-bái：美醜。

【何乜苦】hô-mih-khóo：何必。

【萬不二】bān-put-jī/lī：萬一。

【有 khong-khong】tīng-khong-khong：硬  
梆梆。

【老去】lāu--khì：老年往生。